

**Inatsisartut aalajagiiffigisassaattut siunnersuut Naalakkersuisut peqquneqassasut Nunatsinni nioqqutissat akiisa OECD-imi inuussutissat naliginnaasumik akiisa agguaqatigiisinnerinut naleqqiullugu nunatsinni qaffasippallaarujussuarnerisa sumik tunngaveqarnersut misissussagaat. Misissuinerup malitsigissariaqassavaa iluarsiiisoqarnissaanut kiisalu ungasinnerusoq eqqarsaatigalugu qanoq akit appartinnissaannut siunnerfimmik aaqqisoqassasoq. Misissuineq UKA 18-imi inatsisartunut saqqummiunneqassasoq innersuussutigineqarluni.**

(Inatsisartunut ilaasortaq Per Rosing-Petersen, Partii Naleraq)

### **Akissuteqaat**

(Inuussutissarsiornermut, Suliffeqarnermut, Niuernermit Nukissiuuteqarnermullu Naalakkersuisoq)

### **Aappassaaneerinnineq**

Naalakkersuisut sinnerlugit Inuussutissarsiornermut Aatsitassanullu Ataatsimiititaliaq isumaliutissiissuteqarneranut qutsavigaara, tassani ataatsimiititaliap isumaqatigiittup siunnersuutip akuerineqarnissaa inassutigaa.

Ulluinnarni atugassat nioqqutissat akii innuttaasut inuuniarnermi atugaannut pingaaruteqartorujussuupput. Pingaartumik isertitakitsut akit qaffasinnerannit sunnerneqartarput.

Tamatuma misissorneqarnissaa naleqqutissasoq, siullermeerinermi partiit tamarmik isumaqatigaat. Tamanna ataatsimiititaliap tamarmiusup isumaqatigaa. Ulluinnarni atugassat nioqqutissat akiisa maannakkut qaffasinnerannik attasseqataasunik pisariaqanngitsunik ilusiliinernik immaqalu aamma pisisarnermi eqqussisarnermilu periaatsinik atuuttoqarnersoq misissornissaa siunertaqarluassasoq, aamma Naalakkersuisut isumaqatigaat.

Suliaqarnermut pisussamut atatillugu aamma Kalaallit Nunaanni niuerni iluanaarutigineqartartut, Kalaallit Nunaanni pissutsit immikkut ittuunerat eqqarsaatigalugu, naleqquttumik killiffeqarnersut, aamma isumaliutersuutigineqassasoq, ataatsimiititaliap kaammattuutigaa.

Taamaalilluta ulluinnarni atugassat nioqqutissat akiisa appartissinnaanerannut iluaqusiinissamut suut periarfissaanersut ilisimasaaqarfiginerulersinnaagipput neriunarpoq.

Taamatut oqaaseqarlunga siunnersuut akuerineqassasoq inassutigineqarpoq.